

Paure tchait savaidge (lynx)



El était dains l'temps , aiye y sait , c'ât aidé diche qu'ècmenant totes les hichtoires , mains voilì ... Dains tot les câs , èl était tot pairie in côs , in tchait savaidge que vetchait dains les bôs . E n'étaip'méthaint çt'animâ , minme qu'è ne maindgeait pon de tchée . En lai tête d'enne grante eusine de boûtes de môtre , è vetchait dains l'opuleince .

In djoué airrivé voûé les âtres ainimâs des bôs décidenent qu'è n'aivaïnt pus fâte de couégnatre l'ouïre po povoi vetché , pe note paure tchait savaidge ne vendé pus ren pe se retrovè ruenè .

Lu que vetchait sains tcheusins n'aivait pon l'aivaisie de se trovaie dains çte situâtion . E feut tot penad pai ço que yot y airriavait . Duraint les djoués tot cmen les mois que seuyint è feut oblidie de tchainpoyie de l'hérbe cmen in vuldyaire moton . Mains voilì sai situâtion n'était pon moiouse , pe è se dié que çolì ne poyait pus durie dinche : è viyait redenvi rêtche .

E musaie londgement pe décidé d'allaie emprâtaie de l'airdgent en lai banque . Paure de lu , le président de lai banque , qu'otchupait aito le pochte de minichtre de l'intérieur , de président de lai République , de minichtre de lai dyierre è pe de champion olympique de Sumo , était paitchi en envéllie tchi son tchusin de Palombie , le marsupilami , tchèfe des ainimâ di tchâd . Dâs-lì è feut mâ rciè o pûtot pon rciè di tot . Dinche-là è n'ai poyu emprüntai des sous ! E reveniai en l'hôtâ en se creuyant lai tête pe tot en mâtcheyant enne voudatte de tcheudre è musaie : cment dgeaingnie de l'airdgent ?

E décidé de devni djouernaliste . E se présenté tchi le troquon des « Bôs des Fraintches-Montaignes , » Pe feut engaidie su le tchaimp . « Y m'en vais quèchtionnaie métre crâ . Dâs son aibre poirtchie è voûte tot piein de tchoses . E vai chûrement me baiyie enne ou doux inforamâtons . » Quéques meunutes pus taîd , èl airrié dains le bôs vésin , que se nanme « Le bôs di Bené . »

- Eh ! Métre crâ , diét le tchait savaidge en reluquaint le grôs l'osé , tchaimpe in po ton fromaidge pe vint pai chi .

- Coâ coâ , répondé le crâ .

- Y aî âtche è te demaindaie , pe dâs-lì , nos ne dians pon coâ mais nos dians cment .

- Mnmgmcoâmgm grumgnm

- Y t'aivôs pouéetchaint demaindè de laissie tchoir ton fromaidge ; y ne te comprend pon .
- Mgnmnian gumgnmnpouéchemgn que gmngnumlemnrnaid rmgnun me mgnle gregnmpare .
- Ah ! Qué tête de boqué çtu-lì , muse le tchait savaidge , mains enfin bön ... A !
dons crâ , qués nouvelles dains le câre ?

Le djoué d'aprés le tchait savaidge feut bôtè en lai pôtche de lai rédâction , mains yéte in po lai feûye , vos allèz compare poquo .

Le 26.01.2001

Le Bôs des Fraintches-Montaignes

Métre crâ

Mgnnnnnncoâ grumghymlmntzgnmmcoâ
mgn , coâ nnngmm . Grmgn ; gnmimmcoâ
ggnmmumncôa .

Gnmmmcôa coâ coâ grmgnnnmugbnmm ,
mnn bgrmnümgn coâ : « mgnmmncoâmn
Gn . »



E se retrôvé don en lai gasse pe sains le sous (paure cmen Job) .
Tote lai neut è musé : cment devni rétche ? Mains cment devni rétche ?
En fin de compte , èl imaidgé in moiyin : Y vais traivayie dains les avions . Mains
voilì è n'y aivait pon d'avions . E décidé de baîti lai compagnie MBO (Mèyesres
bieuves ôuere) . Cmen toutes les mèyesres étaïnt dôbement aimouérouses de lu ,
è ne feut pon mâ aisie de trovaie des hôtesses de l'ôuere pe cmen tot les aiyes
sont aimouéreux des mèyesres ce ne feut pon in mâ de trovaie des avions .
Dâs ci djoué lì , lai compagnie crâchu pe note tchait savaidge à redeveni rétche .

FIN

Le tchait savaidge